

IN MEMORIAM

Dragana Bogdanović
(1963–2025)

Dženana Tuzlak

dzenana.tuzlak@nub.ba

U septembru 2025. godine iznenada nas je napustila naša draga kolegica, bibliotekarka, bibliografkinja i kulturna djelatnica Dragana Bogdanović.

Dragana Bogdanović je rođena 1963. godine u Sarajevu, gdje je završila osnovnu školu i gimnaziju. Diplomirala je 1987. godine na Filozofskom fakultetu Univerziteta u Sarajevu i stekla zvanje profesorice historije književnosti naroda i narodnosti Jugoslavije i srpskohrvatskog-hrvatskosrpskog jezika. Magistarski rad na temu *Upravljanje znanjem i intelektualnim kapitalom – autorsko pravo* odbranila je na istom fakultetu 2015. godine, čime je dobila diplomu o naučnom stepenu magistricе bibliotečko-informacijskih nauka.

U Nacionalnoj i univerzitetskoj biblioteci Bosne i Hercegovine (tada Narodnoj i univerzitetskoj biblioteci Bosne i Hercegovine) zapošljava se 1989. godine na poslovima katalogizatora u Odjeljenju za obradu građe, a potom je više godina obavljala poslove katalogizacije u publikaciji (CIP). Iz tog perioda mnogi još pamte izuzetno cijenjenu bibliotekarku Draganu koja je svojim radom, srdačnošću i kulturom ponašanja olakšavala proces izrade CIP zapisa i uspješno saradivala s predstavnicima izdavača u zemlji.

Od 2019. godine radi na Odjeljenju bibliografije, kao bibliografkinja na izradi *Bosanskohercegovačke bibliografije serijskih publikacija*. Njenom zaslugom nastavljen je izrada ove bibliografije u sistemu CO-BISS.BH nakon višegodišnje pauze. U 2023. godini izabrana je u tim od petnaest iskusnih i edukovanih bibliotekara – kreatora i redaktora normativne baze ličnih imena CONOR.BH. Iste godine unaprijeđena je u više stručno zvanje – bibliotečki savjetnik.

Na osnovu svog širokog obrazovanja i stručnog rada objavila je oko trideset članaka i prijevoda u časopi-

sima *Bosniaca*, *Bosna franciscana*, zbornicima *Međunarodne konferencije BAM – Evropske smjernice za saradnju biblioteka, arhiva i muzeja*. Prevodila je na engleski, francuski i italijanski jezik. Izlagala je na više bibliotečkih konferencija i stručnih skupova, učestvovala u radionicama i predavanjima iz bibliotekarstva i informacijskih nauka, bila moderatorica na više skupova i promocija. S posebnom ljubavlju i elokvencijom predstavljala je svoje izrađene *Bosanskohercegovačke bibliografije serijskih publikacija* na sajamskim i bibliotečkim promocijama.

Imala je i zapažen angažman u Centru “Andre Malraux”, “Sarajevskoj zimi” i Centru “Dante Alighieri”. Dobitnica je više priznanja, među kojima je i specijalno priznanje za učešće na Okruglom stolu u okviru Sajma knjiga i učila 2023. godine u Sarajevu, priznanje za sudjelovanje u radu Udruženja građana češkog porijekla “Češka beseda” te priznanja za učešće u radu konferencija Asocijacije informacijskih stručnjaka – bibliotekara, arhivista i muzeologa (BAM). Kao vijećnica Naše stranke u Općinskom vijeću Novo Sarajevo i u Gradskom vijeću Grada Sarajeva dala je poseban doprinos svojim poštenim i dosljednim radom, vjerujući da se samo snagom intelekta mogu pokrenuti promjene u našem društvu.

Sve bibliotečke poslove Dragana je obavljala vrlo temeljito, s puno elana, stručno i vrijedno. Svojim predanim i požrtvovanim radom utkala je dio sebe u razvoj Nacionalne i univerzitetske biblioteke Bosne i Hercegovine. U svemu dostojanstvena, skromna i čestita kroz svaki zajednički rad sa svojim kolegicama darivala je bogatstvo svoje ličnosti.

Bila je i dobar čovjek – draga i pouzdana kolegica, puna dobrote i poštovanja prema svim kolegicama i kolegama, prijateljima i komšijama. Oni koji su

je bolje poznavali znaju da je bila jedna plemenita duša, u svemu posebna.

Ostavila je iza sebe neizbrisiv trag, trag stručnosti, profesionalnosti, posvećenosti poslu i ono najvažni-

je – trag ljudskosti. Ostaje taj trag kao važan dio bosanskohercegovačkog bibliotekarstva i kulture, ali i trag u srcima svih nas koji smo je poznavali i radili s njom, poštovali je i voljeli.